

Persefahaman antara suami dan isteri penting untuk melengkapkan proses pembinaan identiti anak. Gabungan antara akhlak baik diwarisi daripada ibu bapa dan ilmu dipelajari adalah pertautan lengkap untuk menjadikan seorang itu mempunyai sahsiah yang baik.

Setiap insan apabila boleh berfikir, mereka perlu insaf bahawa kewujudannya mempunyai matlamat, perjalanannya mempunyai haluan dan hidupnya mempunyai tugas serta tanggungjawab.

Justeru, umat Islam selaku sebahagian daripada entiti penting dalam masyarakat juga tidak boleh lari daripada meningkatkan kesedaran mengenai persoalan ini dan seterusnya bingkas bangun bermuhasabah diri ke arah mengurus kejayaan hidup di dunia dan akhirat.

Dalam Islam, perkataan pendidikan atau tarbiah antara lain bermaksud suatu pendekatan yang terbaik dalam bertafa'ul (berinteraksi) dengan fitrah insan serta melaksanakan proses pendidikan melalui tunjuk ajar dan teladan.

Teori pendidikan

Suatu teori pendidikan tidak akan sampai kepada matlamat dikehajati jika ia gagal berfungsi dan tidak berkesan. Keberkesanan itu diukur dengan melihat sejauh mana hasil yang dikehajati bertunas dan berkembang dalam diri individu yang dididik.

Hasil pendidikan juga dapat dilihat melalui perubahan tingkah laku, tindakan dan hasil pemikiran mereka. Pendidikan yang tidak berkesan bukan saja merugikan tenaga, waktu dan wang, tetapi lebih dibimbangi apabila hasilnya bertentangan dengan apa yang dikehajati.

Walaupun menggunakan cara yang berbeza, tujuan tarbiah cuma satu, iaitu untuk mengelakkan peribadi dan menjadikan seseorang itu tahu membezakan apa yang baik dan buruk, halal dan haram. Setiap modul tarbiah digunakan adalah pemangkin untuk menyampaikan ilmu secara tidak langsung.

Kehidupan seharian seorang anak bermula dengan bangun tidur secara beradab sehinggalah berakhir dengan pelukan dan ciuman sebelum tidur pada waktu malam penuh modul tarbiah yang akan membina peribadinya kelak.

Malangnya, kekangan demi kekangan

Kekangan hidup jejas proses tarbiah anak

Faktor sara hidup tinggi punca ibu bapa abai tanggungjawab



Kanak-kanak seawal usia diletakkan di bawah jagaan pengasuh kerana ibu bapa sibuk dengan kerjaya masing-masing. [GAMBAR HIASAN]

gan dalam kehidupan hari ini mengganggu proses tarbiah anak-anak. Ibu bapa bukan lagi menjadi pentarbiah yang konsisten, lengkap dengan modul rohani dan jasmani demi mencapai objektif untuk kecemerlangan sahsiah anak-anak.

Ibu tanggung beban cari nafkah

Faktor sara hidup yang tinggi menjadi halangan, sehingga kebanyakan ibu turut menanggung beban mencari nafkah dan mempertanggungjawabkan tugas tarbiah anak-anak dengan modul

kehidupan seharian kepada pembantu rumah atau penjaga di pusat asuhan.

Jika pun pendapatan bapa sudah cukup untuk menanggung keluarga, ramai pula yang hidup melampaui kemampuan. Justeru, ibu turut menunaikan tanggungjawab bapa untuk mencukupkan segala keperluan.

Bahkan ada ibu yang terpaksa bekerja kerana suami tidak mahu menunaikan tanggungjawab itu, suami dipenjarakan, hilang dan sebagainya. Menjadi mangsa ialah anak yang baru mengenal dunia.

Tarbiah yang dibina dengan mem-

pelajari bahawa ibu perlu bekerja dan menunaikan tanggungjawab biologi serta taat sebagai isteri menjadikan anak mengalah serta menjauhkan diri. Mereka anggap mereka bukan tergolong dalam sasaran yang perlu diberi perhatian oleh ibu.

Konflik tanggungjawab

Dalam konflik tanggungjawab ini, ibu bukanlah satu-satunya insan yang harus dipersalahkan apabila proses tarbiah anak-anak terganggu. Banyak perkara yang harus disemak dan diperimbang.

Apabila Islam memberi tanggungjawab tidak sama kepada suami, isteri, ibu dan bapa, ia bukan bermakna Islam meninggikan atau merendahkan mana-mana pihak. Tanggungjawab suami mencari nafkah dan isteri untuk mengandung, melahirkan serta mentarbiah anak sama penting.

Isteri boleh menunaikan tanggungjawab sebagai ibu dan mengambil tugas bapa, tetapi suami tidak mampu menunaikan tanggungjawab sebagai bapa dan ibu atau isteri. Akibatnya, isteri terpaksa mendapatkan khidmat pembantu rumah untuk melaksanakan tugas yang sepatutnya dilakukan suami bagi membantu isteri.

Seorang bapa perlulah mengetahui setiap perincian tanggungjawab sebagai pemimpin keluarga, setiap tugas ada hikmahnya dan setiap amanah ada jarangannya. Dalam konteks agama, seorang itu menjadi pemimpin kerana banyaknya tanggungjawab harus ditunaikan, bukan banyaknya hak yang harus dituntut.

Apabila hakikat ini tidak difahami, maka tugas dan fungsi sebagai bapa menjadi sebaliknya. Daripada menjadikan isteri dan anak sebagai amanah yang harus dijaga dengan baik, mereka menjadikan isteri dan anak pekerja yang dikerah bertugas untuk kepuasan dirinya sebagai 'ketua'.



NIK SALIDA SUHAILA NIK SALEH

Pensyarah Kanan
Fakulti Syariah dan
Undang-Undang
Universiti Sains
Islam Malaysia